

■ UNIUN GRISCHUNA PER IL TEATER POPULAR

Il teater popular grischun ha registrà passa 30 000 aspectaturs l'onn passà

(cp) Il teater d'amateurs en il Grischun è ordvart popular. La retschertga annuala tar ils commembers da l'UTP ha confermà era per l'onn 2011 ina scena da teater d'amateurs fitg activa che fa quint cun in grond publicum. Plinavant fa ina ferma delegaziun grischuna part da la Biennala 2012. L'Uniun grischuna per il teater popular BVV-UTP-AGT ha per il mument 66 uniuns commembras. 55 uniuns han emplenì la statistica da teater 2011 e la tramess enavos al secretariat da l'UTP. Quai correspunda ad ina quota dad 83 perschien. Uschia èsi pussaivel da dar in maletg represchentativ da la scena da teater d'amateurs dal Grischun, e quest maletg mussa ina cuntrada da teater intacta ed activa. Da las 55 uniun èn 42 stadas activas, han pia realisà in u plirs projects l'onn passà. En tut èn quai stadas 47 differentas producziuns da teater ch'èn vegnidas mussadas en 268 represchentaziuns. Bunamain 31 000 aspectaturs han vesì las producziuns, e sche tut las uniuns avessan inditgà il dumber dal publicum fiss questa cifra anc pli auta. Er uschia èn quai cifras impressiunantas che mussan ch'il teater popular grischun è in factur cultural important en noss chantun, era sch'el

na survegn betg adina la renconuschientscha duida.

Biennala 2012:

Quatter producziuns grischunas

Che la scena da teater popular grischuna è activa mussa era la Biennala svizra dal teater d'amateurs 2012. Quest festival vegn organisà mintga dus onns, mintgamai alternand en ina da las quatter regiuns linguisticas. I vegn adina preschenta mintgamai trais producziuns per regiun linguistica. Quest onn ha la Biennala lieu dals 15 fin ils 17 da zercladur a Cossonay en il chantun Vad. E gist quatter producziuns grischunas èn da la partida. Per l'ina ils represchentants da la Svizra rumantscha, per ils quals la BVV-UTP-AGT ha da procurar: *Mario Pult* e *Dario Müller* garanteschan cun ina furmaziun ad hoc che l'Engiadina è preschenta, l'Uniun da teater Cuschnaus mussa ina versiun da 50 minutas da ses toc «Il cor schelau» en Svizra franzosa ed il Teater Baubuzi ch'è vegnì fundà da nov vegn perfin ad avair sia premiera a Cossonay. Vitier vegn il Theater Muntanellas che represchenta la Svizra tudestga cun «Der Bär» da Tschechov. Uschia va ina fitg ferma delegaziun grischuna en Svizra franzosa questa stad.



Producziunda l'Uniun da teater Cuschnaus en Val Lumnezia.